



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8



Ukraine-i takok mongura
WW-III tenzüksü: Ukraine PM

Kento Momota International
badminton asaya nungi anener



VOL. XXI ISSUE NO. 186 (ADOK 186) DIMAPUR ROGONÜ (FRIDAY)

RONGCHII (APRIL) 19, 2024

₹ 5.00

State kübok tesem balalai polling personnel tem ogo



(Abelen) Tetsür kisung aliba polling team tem April 18, 2024 nü pei nem lemzüksüba polling station tem bushia maodang DC Office Complex, Kohima nung tangokba noksa ka angur. (Teyong) Deputy Commissioner, Mokokchung indang office nungi EVMs aser polling materials tem bener tetsür polling officer tem April 18, 2024 nü pei nem lemzüksüba polling station bushia aodang tangokba noksa ka angur. (Achiji) Dimapur DC office nungi EVMs aser polling materials tem bener tetsür polling officer tem April 18, 2024 nü pei nem lemzüksüba polling station bushia aodang tangokba noksa ka angur.

Dimapur, Rongchii/April 18 (TYO): Aruya aliba Lok Sabha elections atema Kohima district kübok polling personnel tem election nung amshitsü osetsüset abeni April 18, 2024 nü Deputy Commissioner, Kohima indang office-i arua liasü.

Brehostibar nep election ketdangsupur Electronic Voting Machines (EVMs) aser Voter Verifiable Paper Audit Trail

Nagaland LS Poll: Tanü nisung lakh 13-i vote agütsütsü, ENPO-i mokdang

Kohima, Rongchii/April 18 (TYO): Nagaland nungi Lok Sabha nung menden ka atema candidate asem-i toktepba tia bendangtsü asoshi asung voters 13,25,383-i pei temeden vote agütsütsü.

Voting ya anepdang 7:00 ako nung tenzüksü aser nikongdang 4:00 ako nung tembangtsü ta state election ketdangtsü ashi.

Nagaland nungi Lok Sabha menden ka asoshi tokteperem ya NDPP-i shimba aser MLA 60 pronglai yarisang Dr Chumben Murry, INC candidate aser state Congress tir S. Supongmeren Jamir aser Independent candidate Hayithung Tungoe Lotha alitsü.

Nagaland nung vote agütsütsü temsüa alir nisung lakh 13 dak tema aliba nungi tang mezüing vote agütsütsü nung 19,999, arishi küm 85 tema teintet rogo 22,140 aser matamabensar 6,707 lir.

State nung vote agütsütsü temsüa aliba tetsür 6,64,460 aser tebur 6,60,923 lir.

Chief Electoral Officer indang office ajanga ashiba agi, poll party tem Pughoboto ADC Headquarter densema election agitsü aliba district 16 kübok polling stations 2,342 togogo. Item nungi polling stations 588 bo 'critical' aser 'vulnerable' ta züingta lir, ta ashi.

Tetsür kisüngi ketdangtsüba polling stations 506 alitsü aser booth pezü bo matamabensar temi ketdangtsütsü.

Polling stations 1097 nung webcasting alitsü aser 82 nung offline videography alitsü, ta osang ajanga ashi.

Election mapang timtem mepetmesü majurutsü mechi

(VVPAT) machines densema election nung nungdakba osetsüset abeni DC Office nung adenshia liasü.

Polling personnel tem district kübok polling stations balalai prokshiba mapang Rev. Dr. Rachülie Vihieno, Executive Director, ABCC ajanga parnok nem temoatsü meshia sarasademtsü.

Kohima district nung polling

stations 186 lir aser 10-Northern Angami-I Assembly Constituency kübok polling stations 28 prong tetsür polling team temi achayangtsü.

Chümoukedima district küboka April 18, 2024 nü polling stations 175 atema election nung amshiba osetsüset tem belenshia liasü. 4 Ghaspani-II atema polling stations 121 aser 5 Ghaspani-II atema polling stations 54 atema

polling ketdangtsü 875 dak tema election duty atema yokogo aser parnok ya all young polling personnel aser all women polling personnel category nung alitsü.

4 Ghaspani-II atema atema EVM receipt & dispatch counter strong rooms ya AEO & ADC, Dr. Kuzonyi Wideo-i lapok aser 5 Ghaspani-II atema AEO & ADC, Medziphema, James Swu lapok aser iba mapang political

party ajak nungi teshimtet nisungtem, security aser ketdangtsürtem arua liasü.

Kasaji Mokokchung district kübok Lok Sabha election 2024 atema polling ketdangtsürtem Deputy Commissioner, Mokokchung office nungi election nung amshitsü osetsüset bener pei nem lemzüksüba polling station bushia April 18, 2024 nü ogo.

District pezü nung CrPC-1973 indang Section 144 sangdongogo

Dimapur, Rongchii/April 18 (TYO): Nagaland Parliamentary Constituency nungi 18th Lok Sabha atema General Election April 19, 2024 nü agitsü aliba dak sendakba nung District Magistrate, Mon, Ajit Kumar Verma, IAS ajanga CrPC-1973 indang Section 144 sangdonga nürburtem telok adenshia senzüsempogba nokdangtsü totuyuba agütsüogoo.

Lok Sabha 2024 atema General Election asoshi nübuyimba maparen poll day tembangtsü ghonda 48 lia nokdang, tetetzü April 17, 2024 nikongdang 4:00 ako nungi. Ajsüüaka Assembly Segment indang DEO/ARPs nungi jelia temelaba meshir ghonda 48

tsüingta kibok sema nübuyimtsü melatsü, ta sangdong ajanga ashi.

Iba election talenba makai timi aser yimjung nung agitetsü mechi CrPC-1973 indang Section 144 benoker aser iba mapang district nung nisung pongu mesüra iba dak tali tesem ka nung adenshitsü memelar, ta District Magistrate, Mon ajanga metetdaksü.

Iba mapang nok-nü/prangbong-hadir bener jajatsü, lokti senden amentsü, yimiyim ayimtsü aser Loud Speakers amshiba memelar, ta ashi.

District nung nürburtem nem timtem agütsütsüsa inyaksangshiba memelar.

Item tenokdangba nung District Administration, Police,

Security Forces, Law enforcement agencies, Emergency Services, Personnel/Vehicles on Election duty madentsü.

Danga constituency nungi political mapa inyaker aser party worker tem aser constituency nung vote malirtem nübuyimba mapang tembangba sülen constituency nungi ainshitsüla, ta ashi.

Iba totuyuba nung aibelener nem IPC indang Section 188 aser Election laws indang danga tapet ozüingtem agi merenshitsü aser iba totuyuba ya April 17, 2024 nikongdang 4:00 ako nungi April 20, 2024 tashi Mon district ajunga nung alitsü, ta sangdong ajanga ashi.

(Maneni tapak 2 nung...)

Lok Sabha menden 102 atema tanü voters 16.63 crore-i vote agütsütsü

New Delhi, Rongchii/April 18 (Agencies): Democracy asoshi benjongmung tulutiba, election nung voters tem pela agizüksü asoshi Election Commission of India ajanga mera balala agiogo.

18th Lok Sabha election Phase 1 aser state pezü nung Legislative Assembly elections asung, April 19, 2024 nü tenzüksü aser tanüingba phases trok ya June 1, 2024 tashi agiyonga orr June 4, 2024 nü vote azüingtsü.

General Elections 2024 indang Phase 1 polling ya States/UTs 21 kübok Parliamentary Constituencies 102 (General-73; ST-11; SC-18), aser Arunachal

as Sikkim nung State Assembly Election asoshi Assembly Constituency 92 nung April 19, 2024 nung alitsü. Vote agütsüba ya anepdang 7:00 ako nung tenzüksü aser nikodang 6:00 ako nung atemtsü (PC shia poll tembangba mapang balala alitsü akok).

Polling stations 1.87 lakh nung voters 16.63 crore alitsü aser polling ketdangtsü 18 lakh alitsü.

Voters ya tebur 8.4 crore, tetsür 8.23 crore aser third gender electors 11,371 alitsü.

Tang mezüing vote agütsütsü nung 35.67 lakh lir aser arishi küm 20-29 tsüingta

lanur voters 3.51 crore lir.

Taküm Lok Sabha election nung candidate 1625 (tebur 1491, tetsür 134) tokteper aser polling aser security personnel anir senzütsü atema helicopters 41, special trains 84 aser gari lakh ka dak tema yoka lir.

Elections tiptema aser tesunep nung agitetsü mechi ECI ajanga mera balala agiogo.

Polling stations shilem 50 dak tema nung webcasting alitsü.

Voters temi timtem majurutsü mechi 4627 Flying Squads, 5208 Statistics Surveillance Teams, 2028 Video Surveillance Teams aser 1255 Video Viewing Teams tenük saker repringshima lir.

Wokha district Lok Sabha election atema renemshir



Dimapur, Rongchii/April 18 (TYO): April 19 nü agitsü aliba 18buba Lok Sabha general election kecha tetsükdaktsü makai yimjung agitsü atema

Wokha district renema lir. Polling personnel aser polling material tem ajak April 18 nü pei tata polling station temi senshiogo.

Polling personnel tem ya DC & DEO, Wokha Ajit Kumar Ranjan, IAS-i achaayanga pei tata polling station temi yokogo. Ajak senteper Wokha district nung assembly constituency pezü; 37th Tyui, 38 Wokha, 39 Sanis & 40 Bhandari A/C nung polling station 215 lir.

DC & DEO, Wokha-isa, district nung tetsürtem kijai achaayangba polling station 60 aser teburtemi achaayangba polling station 155 lir. Ajak senteper tetsür polling personnel 426 aser tebur polling personnel 936 lir, ta metetdaktsü.

DC Longleng ajanga lenmang shibangba metetdaktsür

Dimapur, Rongchii/April 18 (TYO): Changtongya-Longleng lenmang nung Orangkong Village lemjem anasa chainage 29+097 aser chainage 29+227 tsüingta lenmang mesüba aser earth cutting ajanga lendong ajurutsüsa aliba mechi iba lenmang ya khen asoshi shibanga atatsü, ta Deputy Commissioner, Longleng, Dharam Raj, IAS ajanga sangdong ka nung metetdaktsü. Anungji iba lenmang nung

April 22, 2024 (Hombar) anepdang 9:00 ako nungi nikongdang 2:00 ako aser nikongdang 7:00 ako nungi ayatirm 12:00 ako tashi Light Motor Vehicles (LMVs) densema gari senzüba ajunga tarutsü nung sangdong ka magütsü tashi nokdangtsü, ta ashi.

Anungji iba tenokdangba mapang iba lenmang nung mejajatsü ayongzüker, ta sangdong ajangasa ashi.

Kiphire Deputy Commissioner-i metetdaktsür

Dimapur, Rongchii/April 18 (TYO): Kiphire district nung mepetmesü kecha matoktsü aser yimjung nung toktsütsü atema Deputy Commissioner & District Magistrate, Temsuwati Longkumer NCS, Kiphire-i, U/S 144 CrPC of 1973 kübok pa nem tashi agüja aliba amshia April 18 nü 6:00 ako nungi tenzüka April 20 nü tashi Kiphire District nung nisung pongu mesüra tema madenshitsü aser nüngdaka makaba nung garitem senzüsenpong masütsü tetuyuba agütsüogo. Ajisüaka District Administration ketdangtsür aser

staff tem, Security Personnel, Duty nung aliba Magistrate, Medical Personnel aser election duty/essential services dak sendaka alirtem iba tetuyuba küboki maittsü.

Maneni commercial vehicles (goods/passengers) mesüra tenüngdakba osettem belenshiba garitem, Press & Media, Telecom services, Medical emergencies ajak temalen tenokdangba agütsür aliba küboki maittsü.

Jongdak nüngdaka apir iba tetuyuba ya osang agütsüba mapang nungi April 20 nü 6:00 ako tashi benoka atatsü, ta DC-isa metetdaktsü.

District pezü nung CrPC-1973 indang Section... (Tapak 1 nungi...)

Kasa totuyubaji Deputy Commissioner & District Election Officer, Noklak ajanga Noklak district nunga agütsüogo.

Iba totuyuba ya April 17, 2024 nikongdang 4:00 ako nungi April 20, 2024 anepdang 6:00 ako tashi alitsü, ta DC & DEO Noklak ajanga ashi.

CrPC 1973 indang Section 144 kübok tashi agüja aliba amshia 6-Tening AC aser 7-Peren AC nung nüburtem sunepa alitsü mechi April 17, 2024 nikongdang 5:00 ako nungi April 20, 2024 anepdang 5:00 ako tashi Peren District nung nisung pongu aser tema adenshiba, menüngdakba gari senzüba nokdang, ta Deputy Commissioner & District Magistrate Peren, Vineet Kumar-i sangdong ka nung ashi.

Iba talenba küboki District Administration indang ketdangtsür aser staff, Security Personnel, Magistrate of Duty, Medical personnel, election duty/essential services nung alirtem maittsü.

Iba tenokdangba küboki commercial vehicles (goods/passengers) mesüra essential commodities bena aliba garitem, Press & Media, Telecom services aser medical emergencies tem maittsü.

Iba totuyuba nung aibelener nem ozüing agi melaba ama tapet temerenshi agütsütsü, ta DC Peren ajanga ashi.

Deputy Commissioner & District Election Officer, Tuensang A. Zibenthung Kithan, NCS-ia sangdong ka nung 18th Lok Sabha Election 2024 atema April 19, 2024 nü General Election agitsü aliba atema nübuyimba mapang April 17, 2024 nikongdang 4:00 ako nung tembangogo, ta ashi.

CrPC 1973 indang Section 144 nung tashi agüja aliba amshia election dak sendakba nung lokti senden ayongba, agiba, adenba mesüra iba amala senden nung jembiba nokdang. Cinematography, television mesüra iba amala yimya nung

election dak sendakba maparen nübur dang sayutsü memelar, ta sangdong ajanga ashi.

Lokti senden densema district nung nisung pongu mesüra iba dak tali adenshitsü memelar saka jelia DEO/ARO nungi temelaba agir kibok sema nübuyima jajatsü akok, ta ashi.

Assembly Constituency nung malir mesüra vote malir political mapa inyaker, party worker mesüra nübuyimertem tekeratiba nung ainshitsüla, ta DC & DEO Tuensang ajanga ashi.

District Administration indang ketdangtsür aser staff, security personnel, Magistrate on duty, medical personnel, tatidang atema senzüba kaketshirtem aser election duty nung aliba nisungtem aser tongtipang services tem iba tenokdangba küboki maittsü, ta ashi.

Tuensang district ajunga nung iba ozüing ya April 17, 2024 nikongdang 4:00 ako nungi April 20, 2024 anepdang 5:00 ako tashi amshitsü, ta sangdong ajangasa ashi.

Western Angami GBs Union silver jubilee mungogo



Kohima, Rongchii/April 18 (TYO): Western Angami GBs Union (WAGBU) tenteter küm 25 ajungba jubilee mung Bodhbarnü Sechü Zubza Village Council Hall nung mungogo. Iba sentong nung Angami Public Organisation (APO) Tir Mhiesizokho Zinyü tongti tejaoker liasü.

Sentong nung o jembiba mapang, Zinyü-i GB tem ya koda tongtibang iba indang lemsatepba den GB ya colonial mapang tenzük aser yimtsüing nung tambusang GB ama shima liasü, ta ashai. Ajisüaka mapang melenshia aoba den külemi lanurtem nema GB khuret nonglokja arudar, ta paisa shisem.

India Constitution Article 371 (A) ajanga Naga nunger sobaliba aser inyakyimtem

küzmüka tokja lir, aser GB tem ya sobaliba temzüing ozüing aser inyakyimtem aser iba den sobaliba balala aser libaliro küzmüka ayurtem lir, ta pai ashi.

Iba dak sendakba nung pai, GB temi ochishia nokdaktsü koda tongtibang iba indang lemsatep.

Paisa, parnok dang pei tata Deputy Commissioner tem kübok temzüing ozüing azüoktsü atema administration nem teyari agütsütsü asoshi pei mapa nendanga inyaktsü ayongzüka liasü.

Maneni Zinyu-i nüburtem dang GB tem akümtsübuttsü ajungshi, kechiyong parnok ya khel aser yimtsüing tenüing nung nokdaker, ta ashi.

Sentong nung APO Tir Razouvotuo Chatsu, Western Angami Public Organisation Tir

Kepelhouto Chusi aser All Angami GBs Union Tir Thepfukedo Kuotsu nunger ajaki salem osang lemsatepa liasü.

Kasa mapang nung finance committee convenor Neithoville Mor-i union kümetba aser puti otsü lemsatep.

Iba sentong ya WAGBU Tir Vilazosie Punyü lenisüba nung agi aser Catholic Church Sechü Zubza, Catechist Medolepra Rino-i Tsüngrem temaotsü meshizüka sarasadema liasü. Sentong nungsa Souvenir Committee secretary Neigweto Mor-i lokti pela agizükba o jembiba aser WAGBU vice president R C Angami-i tepela o jembiba liasü.

Mezoma nungi sentong nung shilem agirtemi ken tajung ka tena liasü.

Manipur election atema paramilitary forces company 200 yokogo

Imphal, Rongchii/April 18 (Agencies): Manipur kübok mepetmesü adoker aliba arrtsü nung mangatetep kecha makai election sadem sadema agitettsü atema state force nem teyari agütsütsü asoshi para-military force company 200 yokogo.

security briefing ka agiogo. April 19 aser April 26 nü state nung 18buba Lok Sabha elections agitsü atema paramilitary forces company 200 shi yokogo.

Iba senden ya Th. Kirankumar (IAS), District Election Officer, Imphal West lenisüba nung agi aser election kecha tetsükdaktsü makai agitsü atema District Election Office, Imphal West-i security dak sendakba nung onük balala benokba sensaksema liasü.

Bodhbarnü 1-Inner Manipur Parliamentary Constituency kong April 19 nü Lok Sabha election agitsü lir iba atema District Election Office, Imphal West nung



April 17 nü Department of Economics, Salt Christian College, Dimapur-i, "Distinctive features of vendors in daily market and weekly market" omen dak ajemdaker field work ka ayongzüka agiogo. Tesayurtem tawabangba kübok kaketshirtemi lendi nung yokyatsüyar 30 den parnok tebilemstü, anosotsü jenjang aser parnoki sen kwi aazüker iba indang asüngdanga sensaksema liasü.



April 18, 2024 nü New Delhi nung linük tatong Tir aser Rajya Sabha Chairman, Jagdeep Dhankhar-i BJP lenir Dr. Sudhanshu Trivedi nem Rajya Sabha MP tenangzükba agidaksüdang tangokba noksa nung angur.

Tanü Lok Sabha menden 102 atema voters crore 16-i vote agütsütsü

New Delhi, April 18 (Agencies): Hokolbarnü Lok Sabha elections mezüngbuba shilem nung states aser union territories 21 nung menden 102 atema voters crore 16.63-i vote agütsütsü.

Election mezüngbuba shilem atema polling station lakh 1.87 renemogo aser security sepai lakh 18 dak tema lemzütsüogo.

Voters crore 16 nungji tebur crore 8.4, tetsür crore 8.23 aser third gender 11,371 lir.

Tang mezüng vote agütsütsüpur lakh 35.67 aser arrshi küm 20-29 tsüngdapur voters crore 3.51 lir. Lok Sabha menden 102 atema candidate 1,625-i tokteper aser iba nungjagi tebur candidate 1,491 aser tetsür candidate 134 lir.

Election mezüngbuba shilem nung tongti candidate tem rongnung K Annamalai (Tamil Nadu BJP Tir K Annamalai) densema lir. Pai DMK lenir

Ganapathy P Rajkumar aser All India Anna Dravida Munnetra Kazhagam (AIADMK) nungi Singai Ramachandran nunger den tokteptsü.

Nitin Gadkari (Union Minister of Road Transport & Highways)-i Maharashtra kübok Nagpur menden nungi Congress candidate Vikas Thakre (Nagpur West MLA) den tokteptsü.

Jitan Ram Manjhi (taoba mapang Bihar Chief Minister)-i Bihar kübok Gaya menden nung RJD candidate Kumar Sarvjeet den tokteptsü.

Nakul Nath (taoba mapang Madhya Pradesh CM Kamal Nath'er jabaso)-i Chhindwara menden nung BJP candidate Vivek Buntay Sahu den tokteptsü aser Gaurav Gogoi (Lok Sabha nung Congress' deputy)-i Jorhat menden nungi tokteptsü.

Karti Chidambaram (Sivaganga MP)-i BJP

candidate T Devanathan Yadav aser AIADMK candidate Xavier Dass na den tokteptsü aser Tamilisai Soundararajan (BJP lenir aser tawa Telangana Angh menden nungi anensang)-i Chennai South nung tokteptsü.

Election mezüng anogo nung sepaitem senzüsempongtsü atema helicopter 41, Special train 84 aser gari lakh ka jungnüa renemogo.

Ozüng alema inyakba mita reprangtsü atema state tem tsüngda arrtsü nung check post 1,374 aser International arrtsü nung check post 162 renemogo.

Arrshi küm 85 ser temapurtem aser matamabensar lakh 14.14 nem pei kidang vote agütsütsü atema temeja maongka agütsütsü.

2024 general elections ya shilem tenet lemsar April 19 nungi tenzüka June 1 tashi agitsü aser election agiba osangji June 4 nü sangdongtsü.

TMC-i West Bengal Angh anema EC nem tashishiba ken o agütsü

Kolkata, April 18 (Agencies): Brihostibarnü Trinamool Congress (TMC)-i, West Bengal Angh, C V Ananda Bose-i state nung Lok Sabha election dak sendakba nung jangjonger, ta tai tonglokja Election Commission nem tashishiba ken o agütsüogo.

TMC lenir kati, "Angh C V Ananda Bose-i Lok Sabha election nung maneni

jangjongba aser 'silent period' mapa aser polling anogo nung polling area semdangtsü merangba atema pa anema Election Commission nem tashishiba ken o agütsüogo," ta metetdaksü.

Bodhbarnü Election Commission of India-i West Bengal Angh, Ananda Bose dang Lok Sabha election mezüngbuba shilem agitsü

anogo ka jelia pai Cooch Behar semdangtsü sentong alibaji thinenang, kechiyong ibaji election 'Model Code of Conduct' ozüng alema lir, ta metetdakja liasü.

April 19 nü Cooch Behar nung Lok Sabha election agitsü, anungji Bodhbar aonung nungi tenzüka ghonda 24 'silent period' sangdonga election nüboyim memelar.

Chhattisgarh state nung ita pezü tsüngda Maoists 80 tepsetogo

New Delhi, April 18 (Agencies): Taküm küm tenzüker ita pezü tsüngda Chhattisgarh nung sepaitemi Maoists 80 tepsetba den külemi 125 puogo aser 150-i peisasa 'surrender' süogo; tesüiba anogo ana tsüngda kija nung Maoists telungpur 29 khasetogo, ta Brihostibarnü ketdangsertemi metetdaksü.

Linük nung Maoists dak sendakba rara shilem 52 ajema kümogo aser item rara nung nisung asüba shilem 69 ajema kümogo; 2004-14 nung Maoists dak sendakba rara nung nisung 6,035 asüba den medemdangra 2014-23 nungbo nisung 1,868 dang asü, ta Union home ministry data ajanga metetdaksü.

2023 küm Chhattisgarh nung Vishnu Deo Sai sorkar tentetba sülen Maoists telungpurtem anema operations junga agiba ajanga taküm January nungi tenzüka tang tashi nung telungpur 80 tepsetba den 125 puogo aser 150-i 'surrender' süogo, ta ketdangser kati metetdaksü.

Yaküm Maoists telungpurtem timtem agütsüba state tem nung security tensa asadanga sülen Union Home Minister Amit Shah-i security sepaitem dang Maoists telungpurtem anema sashia mita aotsü tetuyuba agüja liasü.

Shah tetuyuba nungji ajemdaker high-powered committee ka tentet, aser iba committee nung züngsemtemji director generals of police, Central Reserve Police Force aser Border Security Forces nung director generals, Indo-Tibetan Border Police aser Intelligence Bureau nungi tongti ketdangsertem densema lir.

Mongolbarnüa Chhattisgarh kübok Kanker district nung sepaitem aser police senteper Maoists telungpur 29 khaseta liasü.

2014 küm nungi tenzüka sepaitemi Maoists bulua aliba tesemtem nung camp amenoker aser 2019 küm kija nunga sepaitemi camp 250 dak tema amenoka liasü.

Tesüiba küm pongu tsüngda Maoists-i timtem agütsüba district 90 nung post office 5,000 dak tema amenok aser district 30 nung bank branch 1,298 aser ATM 1,348 amenoktsüogo.

Maoists telungpurtemi timtem agütsüba tesemtem nungsa mobile tower 4,885 amenok aser gari lenmang kilometer 9,356 yangluogo.

Ketdangsertemi ashiba agi, Maoists-i timtem agütsüba tesemtem nungsa Eklavya residential schools 121, ITI 43 aser skill development centre 38 lapoktsüogo.



April 18, 2024 nü Agra Fort nung bendanger raliwalirtemi World Heritage Day amongdang tangokba noksa nung angur.

Telangana nung Khristan school ka nung Principal nem tilak teptsü

New Delhi, April 18 (Agencies): Telangana nung Mancherial district kübok Kannepalli yim dak Khristan school ka nung principal-i kaketshir kari 'saffron' sentsü semer school-i aruba ashishiba agi lokti kati school ji amak aser staff tem dak teka sangshi.

Bodhbarnü Blessed Mother Teresa High School ketdangsertemi, anogo ana tejaklen school principal-i kaketshirtemi school uniform masü saka 'saffron' süoshi semer aruba agi tsüraburtem school-i anir arung ta tuyua liasü, ta metetdaksü.

Tesülen telok kati school ketdangsertem dang tatok meshiang ta takhangba agütsü aser karibo longkak aita school

kichiba raksatsü. Longkak aiterem jagisa school correspondent aser principal dang tatok meshiang ta takhangba agütsü aser kari principal Joseph longbanger azük aser kangshia tentütsü nung 'tilak' teptsü.

Lokti kati saffron süoshi semer 'jai shri Ram' ta ayimdena school dak lung onoktsüba video ka social media nung prokshio.

Dandepally police-i ashiba agi, kaketshirtem tsüraburtemi tashishiba ken o ka agütsüba nung ajemdaker school ketdangsertem anema ken o ka benokogo.

Blessed Mother Teresa High School ya Hyderabad nungi kilometer 250 shi pilar lir.



April 18, 2024 nü Pune nung NCP (SP) lenirtem- Supriya Sule, Dr.Amol Kolhe aser Ravindra Dhangekar nungeri Lok Sabha elections nung tokteptsü atema nomination file asüba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, APRIL (RONGCHII) 19, 2024

Vote shiba nem enoktsütsü ?

Tanü ya Nagaland nungi asenok ajak tenüng nung Lok Sabha tatar hoho nung oa amentsü asoshi election nung tokteper asem rongnung aseni sülokba ka shimtetsü. Atangji, candidate asem, ka Congress, ka NDPP aser ka Independent ta ser tokteper saka shitakba yimten tongpang yabo Congress aser NDPP na tsüngda rarar amato kümogo. Ano, Congress yabo Nagaland assembly nung züngsem kata mali aser ano parnok amaji tatar züngsem kata maliba yimten telok tasen ka tenüng agi Rising People's Party purtemi asemer. Ano külen NDPP telok yabo BJP aser Nagaland government nung dena aliba yimten teloktemi asemer, anungji khen bilemtsübo NDPP telok yagi Congress telok ya melamelaa akoktsü amai bilemer. Ajisüaka, meimlaika Congress telokia iba election tongpang nung ya kanga sashia nokdakba angur. Iba jagi vote meinoktsü aser vote mazüng tashibo Congress o NDPP candidate na rongnung shibai akoktsüar meshitetka kümogo. Ibaji asenok vote ajanga bendangtsü, anungji naa shiba nem kechi atema nü vote agütsütsü ? Asenok Nagaland nungbo tezudangtsüka yimten telok (political party) nükjidong angateta adenba yimten lenirtem aikabo mali, anungji election-i aiertema election nung toktep shia yimten telok balala tenüng nung toktepba angur. Kasaji asenok nübertema yimten telok angatetba nung masü saka pei pei angatetba nung vote agütsütsüsa akümer, iba jagi nübertem dak yimten tashi liaka election temerbo iba tashiji mamshitet, kiburtemang kilir akümer aser kilirtemang kibur kümer pei sünütsü süa yimsü asüba agi nübertem libaliro jenjang tajungba makümer. Atangji, tang election nung yabo nübertem tangatetba tajung kati arur amai reprangteter, kechiyong tesem aika nung candidate dang sen meshiasa aruba melena to tangbo nübertemiang candidate nem tenla agüja yaritepba angur. Aji oda, yaküm assembly election tashi shinga party manifesto indang mejembi saka senso candidate aser sen otsü dang jembia aru, anungji election mapang asen lima renloktsüba sentongtem aser nübertem asoshi inyakttsü bilemba onüktem indang kenyongi mejembi sen agi vote ali aser sen yong vote ayok ta vote agütsütsüba mapang tashi shishilembaa kazür election tembangdaksüogo. Iba ama election agiba ajanga ajangzükbaji tatar (MLA) 60 rongnung opposition nung mener mali, ajak ruling telok den denüba agi tang Nagaland nungbo opposition tejang kata maliba assembly aser government küma lir. Democracy nung aji tajung tazü masü. Nagaland nung temelenshi nungdakba tesemji assembly nung opposition nung mener maliba tesem ya ka asütsü. Atangji, yimten nung tazü tazü nübertem nem yutsür tamen tamenbo ajak shidena pei agitsü bendenba nisung yimya aser mulungjang melenshitsüla. Tangarbo yimsüsür asütsü atema election-i aiba nükjidongji aluyimertem nem teyari agüja alu tajungba yimdaktsütsü, lanurtem asoshi mapa inyak angazükdak aser mapa inyakdak tesemtem lapoktsütsü, alima nung tzü mopong merüka ayuba nung shilem agitsü, senso shia temeten kümzüka yutsütsü, sobaliba aser tamangba yimsü nung nübertem asoshi talenba malitsü aser senso ajak pei taküm agi pei akhümketa alitsüsa temzüng ozüng ajanga temeten agütsütsü ta asüba ama onüktem nübertem den jembia aier aser nübertemia pei bilemba aser inyakdaksünüba mapatem lemsateper. Democracy-i senso shia nem bener arutsüba temeten aser tashiji aji lir. Ano, talisa India lima ama kin kidong aser oshi balala aika agi akümba lima ayimbanga yimsü asütsübaji temela masü. Ibaji temzüng tesashi latetba aser ozüng tesashi agütsüba agi makoktsü saka kin balala, oshi balala, tamangba yimsü balala aser sobaliba balala rongnung kati ka akhümstübutepa aliba agidang India telungjem ya meraksai litettsü. Iba ama tangatetba nung India lima aser Nagaland nunga nübertemi ochishia pei vote peisasa agütsülasang, asenoka India nung temeten tajung akaba senso ama tetsübu aser terata melii nümadangdanga lila. Ibaji bilema nü senti vote sarasadema agüjangma.

OLEMSABANG

Tanemba Jendi Liaka Khrista Yimli Wazüka Yudi

- Dr.R Zulu Jamir, Kumlong Baptist Arogo

Alima putu ajak nung Yisu Khrista dak amangba agi amokmerenba aser rishikangshia sūdaktsüba ya kechi tai ajanga ta bilemer? Roman yimli merena aliba mapang Tsüngrem chir Khrista alimai aru. Herod chubai anir yimsüsür ajungai Tsüngrem chir Yisu Khrista atsüngdoktsü tasa aika asa. Roman yimli nungsa Nero yimsüsüba mapang 54-68 AD nung Yisu Khrista dak amangbapur ajak samatsütsü nükjitong nung rishikangshia sūdaktsütsü tasa balala amshia inyak. Yisu nütsüngtem Yohan dak alaka tanüngba nütsüng ajak rishikangshia sūdaktsü. Saka rishikangshi koma tuluba liasü, yamaji Khrista yimsü tuluba jangrua ao. 313 AD nung Roman yimli nung yimsüsür Constantine-i Yisu Khrista agizük, iba sülen Roman yimli nung Khristan yimsü senso ajak asoshi tamangba yimsü asütsü agizüktsü sangdong. Ibai Tsüngremer ain mapa tulu jungkai adokba rongnung ka lir.


1933-1945 mapang Germany nung Adolf Hitler lenisüba kübok Nazi telok tashi kanga ulua aküm. Adolf Hitler yimsüsüba tendak Germany nung Arogo meyi terti (eighteen thousand churches) liasü. Item rongnung Arogo meyi aseme (3000 churches) Hitleri aniba Nazi telok anem. Kodang Hitler yimli Germany nung amenok, pai item Arogo nung Pastori anir amangbapur ajak tepseta indok. Adolf Hitler tsüngrem ama kümer yimsüsüba mapang küm ishika tsüngta nung tai maketba Yihuda nung million 6 tashi tepset. Hitler ama shibai pei yimsüsüba mendenji ajak madak tematiba küma tashi amshia nokdak, mapang tatsüka tsüngta nung tsüngrem kümnüsang yimli jenjang makai sama.

Tanü asen India nung küm aika Yisu dak amangba agi rishikangshia sūdaktsüba zünger mezüngdangma ajangshia arur. Khristan school rongdoktsüba, tenlaki rongdoktsüba, aser pastor taküm aser kibong den amangbapur jenjang makai samatsüba item temeden kong lir? India nung Khristanem kecha tai makai rishikangshia sūdaktsur telokji RSS hindu tamangba yimsü ya lir. Tia kangasa maka iba hindu tamangba yimsü tentetba political party ajanga küm ter tashi India ajunga amokbanga yimsü süa arur. India nung RSS teloki dang ano maneni yimsü süa ora, India senso tajung tali majungtsü. Anungji tamajungba agi memenep dang mera tajung agitsü mapangbaji tang ya lir. Tanü democracy lima ka nung senso ka temeden ajak nembanga yutsür, ozüng tenük tapok kümdaktsür tashiyim mapa inyakba ya tetamatsü ulura. India ama democratic lima ka nung Prime minister aser legislative Assembly member ajak nüburtemi shimteter. Saka tanü ruling political telok ket nung; Reserve bank of India, High Court, Media-Technology aser Military tashi ajak amshia yimsü asüba ajanga tanüngba nüburtem jenjang aser temeden maka. Temeim Khristanpurtem, asenoki shimteta political tashi amba telok kati asenok khristanem aser minorities telok balala rishikangshir süra, kechiba rishikangshir telok ka nem asen temeden agütsütsü? Iba ama tetsübuttsü aketba telok ka nungi kümzüka alitsü asoshi Khrista dak amangbapur shiai; mangdang akaba, sobaliba, kin kidong, aser tamangba yimsü ajunga kasa meimba lenir nem asen meyongnem agütsüdi. India lima ajunga nung Khristanem dang masü, saka tamangba yimsü balala den hindu nungeria pei nübur anemba kanga bulua angur. Ya India lima nung temelenshi ka arur südi ta bilemer. Anungji shirnoki na aser Yisu anemer, parnok asoshi asen temeden magütsüli. Mapang aser tensa tamajungba agi memenepdang, item telok nem yimsü asütsü yimli aser sabang memelatsüsa nokdangdi.

Temeimbatem, Daniel 1:8, nung shia lir, 'Saka Danieli pei mulungba nung chubar chiyongtsü tajung mesüra pai yi ajemba agi pa sasa pa memenentsü ta mulungtet.' Asen taküm aser lokti nunga temelenshi asoshi temulungtetba ka dang nungdaker, aser aji ne telemtetba tajungji lir. Tanu Khrista dak amangbapur shiai temenen inyakyim matsüngdang iba o ya tasü ita ashitsü nungdaker. Asen lima nung Yisu meimba pur jendi tenüki angur. Arung ochiji yimdong nung laoa lir, asenoki iba ochibaji mesodi. 13th April 2024, anepdang 3:49 am süia aodang asen Aor asoshi Tsüngremi mangdang tejangja ka sayu. Mangdangji yamai liasü; asen Aor telok tulu ka tzüyim ka ajangdanga aotsü kecha lemanng makai lia, ola kati ashi! tatsüka or iba tzüyim ajangdangtsü lemanng ka lir, anungji iba jaki oang ta ashiba den iba tzüyim ajangtsü lemanngji ngua tzüyimji atendanga ao. Temeimbatem, Tsüngrem mezüng chir ka ama asen Naga nung rongnung asen Aortem Pai shimtet. Tanüa asen Aor ajanga Naga kin tejakleni anitsü Tsüngremi asenok amshinür. Israel nüburtem tejakleni temerem tzüyim, aser tesülen Egypt nung kor talungtsü nung aria arur ta asüba tensa ka nung, Tsüngremi tzüyim ana küma sadanger Israel purtem anitetba ama, asen Aor asoshi Tsüngremer sentong tulu ka lir. Anungji iba temoatsü aosu memeküpdoktsüsa Tsüngrem sentong dangi ka küma longjemshidi. Asen senso temeden aser asen kümtetdakba Yisu kecha dena memeyoktepli. Atangji tongpangji tulu, Yisua Yohan 16:33, nung shia lir, 'Alima nung nenok timtem tekangshi kar, saka tasü itang ni alima kokogo.' Atangji timtem tekangshi jendi liaka asenokia tongpang ajak Yisu tenüng nung koktetsü. Amen.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nagaland Bible College Mkg nung 43buba graduation sentong agi



April 18, 2024 nü Nagaland Bible College 43buba Graduation sentong nung graduate asürtem, Principal, tesayur aser sentong nung shilem agirtem külemi tangokba noksa nung angur. Telung noksa nung Convocation Speaker Rev. Kerstin Olsson (Chairman Pentecostal Church, Sweden) angur.

Mokokchung, Rongchii 18 (TYO): Brihostibarnü Nagaland Bible College 43buba Graduation sentong Nagaland Bible College indang Discovery Hall nung agiogo. Nagaland Bible College

43buba Graduation sentong nung Convocation Speaker ji Rev. Kerstin Olsson (Chairman Pentecostal Church, Sweden) liasü. Nagaland Bible College nung taküm Masters of Divinity nung nisung pongu, Masters of

Ministry nung ana, Bachelor of Theology nung terka, Bachelor of Ministry nung pongu, M. DIV (DL) nung ana aser Institute of Inter-Cultural Studies (IICS) nung nisung 5 Graduate süa liasü.

Court-i shimba justice anati Church of South India ketdangsütsü

April 18, 2024: Church of South India (CSI) ketdangsütsü atema court kati mapa nungi anisingzüker aliba judge ana shimogo; CSI kübok India aser Sri Lanka na nung diocese 24 lir. Justices- R Balasubramanian aser V Bharathidasan na April 18 nü Chennai yimti nung aliba CSI headquarters tonga ogo. Tamil Nadu nung Madras High Court-i shimba judge ana jagi Arogo ketdangsertem ajurua sensaksemogo. Parnoki senotsü transaction atema April 30 tashi treasurer nokdang. Joko Synod madak Arogo

ketdangsertem tashi mali. "Nija putirtemi maneni parnok teinyaktsü shilem inyaktsü akok saka telemtetba agitsü atemabo Synod mesüra Trust Association dang nungi tama temelaba agitsü nüngdaker," ta April 18 nü Arogo ketdangser kati metetdaksü. April 12 nü Madras high court-i Diocesan Council election magi tashi Arogo ketdangsütsü atema judge anaji Arogo administrators shim. Arogo rongsen aser kiojen dak sendakba nung Arogo lenirtem tsüngda mangatettep adok aser Arogo lenirtemi 2022 küm taoba mapang moderator

Bishop Dharmaraj Rasalam anema ken o benokba sülen pa mapa nungi anentsüogo. Temepishiba ken o agütsürtem jagi court dang Rasalam-i Arogo temzüng melenshir aser senotsü dak sendakba nung ochimashi inyaker, ta tai tonglojka liasü. 1947 küm India nung nuchiso anguba sülen Church of England, Church of India, Burma & Ceylon (Anglican), South India United Church (Congregationalist), British Methodist Church aser Church of Scotland densema Protestant denomination-i CSI ya tenteta liasü.

Putir Mar Mari Emmanuel-i pa yirutsüsang dang tai atoker



April 18, 2024: Tawa Australia yimtiba, Sydney nung tongti putir, Mar Mari Emmanuel-i Tenla kidang sayutsüngiba mapang nung tebur ka sabang jagi tua kotari agi pa yiruja liasü. Brihostibarnü Emmanuel-i pa temang tajungba kümdar aser pai pa amaksang dang tai atoker, ta ashiba den külemi pai pa amaksang dang 'Na kü jabaso' ta ashi. Hombarnü Tenla kidang putir Emmanuel-i 'live' sayutsüngiba

mapang nung arrshi küm 16 tebur kati kotari agi pa tekolak aser teku yiruja liasü, iba sülen Assyrian Christian Arogo nung züngsemtemi iba tatalokba anema longkak ait. Wakeley nung aliba Christ the Good Shepherd Church nung Bishop, Emmanuel-i, "Ni tang tajungba aser kanga keraa anepdar," ta ashi. Sydney kübok Wakeley nung aliba Christian Assyrian Arogo nung züngsemtemji teimbaka Iraq aser Syria na

nung rara ajanga Australia-i jena arurtem lir. Online nung Emmanuel indang 'followers' 200,000 shi lir aser pai sayutsüngiba video tatsütsü aika YouTube nung angutsü. Mongolbarnüa Emmanuel-i video ka ajanga, "Shisabulutsü mesüra tebilemtsü akatsü menüngdak. Ni anema inyaker shiba südir süaka ni ajak dang tai atoker aser ni pa dang; Na kü jabaso, ni na meimer aser na asoshi teti sarasademtsütsü, ta ashir. Ni anema inyaktsü asoshi nü dang tuyurtem danga ni tai atoker," ta metetdaksü. Hombarnü Tenla kidang iba tatalokba sülen arrshi küm 16 asangur chanuji Sydney nung aliba hospital kati anir oa liasü. Iba tatalokba sülen Arogo züngsemtem aika tejashi nung adenshia longkak aيتدang police aika yirutsüba den külemi police meyong gari 50 raksaja liasü.

ANOGO ABEN TSÜNGREM DEN

Tiyazü tanelatem

"Tanela ajak dak tamang, saka tanelatem Tsüngrem nungi asü masü parnok tendangang". - 1 Yh 4: 1.

Arogo otsü nung mi balaka aika ajangashia aruba kuli lir. Asentenshi mapang ya ataloker. Mezung tenyartem arogo nung iba mi asoshi tekumdangtsü agütsüba dang masü, iba anema noktaksü renema alitsü ashi. "Tanga Yisü, " osangtajung balaka" aser "Tanela balaka" anema tekumdangtsü ashi (2 Kor 11: 4).

Shitakba Tsüngrem tenzükerterem dang nungi tiyazü ainkar timba adok. Iba indang Lai tapu itemi repringang" 1 Yh 2: 18; 4: 14; Mt 7: 15,22; 24:15; 2 Kor 2: 17; Fil 3:18 züngang. Yisui tiyazü ainkartemji "tzünglu", "tzümetsüng", aser" mopung" agi atishia jemi (Mt 7: 15, 25). Pauli tesayuba "mopung shia agi meinzüdaksütsü" zülü (Ef 4: 4). Tasen Lai nung tanela balalai Arogo nung tenzüker balala amshi (Ef 4: 11).

Asenoki tiyazü tenyar (2 Kor 11: 13), tiyazü ainkar (Mt 7: 5), tiyazü sayutsüngir (Gal: 6-8), tiyazü sannüker (Yn 10: 12) aser tiyazü tesayurtem (2 Pet 2: 1). Tatemang mapang nung tiyazu ainkar aser tesayurtem adoktsü ta Laishiba nung tekumdangtsü Tanela Temeshi ajanga jungkai adoktsüba zülü (1 Tim 4: 1). Mekumdang tamangertem tamang nungi atsüngzucker odaktsütsü. Ibai pei tamang jendokba masü saka mesüzükba asütsü. Tenyartem ajaki tanela balala nung sayuba anema jemi. Pauli parnok nem agütsüba tenüngtemji repringang: "Tekulak inyakerterem" (2 Kor 11: 13), "timtemdaksür" (Gal: 7), "tiyazti adianu" (Gal 2: 4), "mashileni odaktsür" (Gal 3: 1). Tsüngrem tenüng sanga aji bushidi.

Myanmar nung Kachin Baptist Convention nung Tir, Samson chiokogo



April 18, 2024: Taoba mapang Kachin Baptist Convention (KBC) nung Tir, Rev. Dr Hkalam Samson was Bodhbarnü (April 17) Myanmar kübok Kachin State nung aliba Myitkyina jail nungi chiokogo. Myanmar nung kum tasen nüngtem nung sepaitemi tepuokdak alir 3,303 chiok aser parnok rongnung Khristan lenir, Samson densema liasü. Dr Samson indang lawyer, Dong Nang-ia pa chiokba osangji jangjatsüogo. Rev. Samson ya 2022 küm December ita nung Mandalay International Airport nung lia sepaitemi apu. Pa medical treatment atema Thailand-i aotsü lia apu. Pa anema ken o angadangba sülen Good Friday anogo nung pa küm 6 tepuokdak ayutsü obendang agüja liasü. Ozüng alema lokti adenshiba, linük tenüng menüktsüba aser kiralongraba atema pa aija liasü, ajisüaka ajakji yimtenren tsütsülen nungi tiyazü nung tai tongloksüba liasü. Iba mapang nungji Baptist WorldAlliance-i, "Pastor Samson anema obendang agütsüba ya kanga tia maka. Alima tesem ajaklen Khristantem adenshir Yisü Khrista dak tamang akaba sangdongba mapang ka nung pa apu," ta metetdakja liasü. Samson ya Myanmar nung lisopur minorities temeden atema ola adoker ka aser linük nung yimsü temeden atema ola adoker ka lir. 2019 küm nunga Dr Samson-i taoba mapang US Tir, Donald Trump dang Myanmar nung lisopur minorities anema inyakba osang metetdaksüba atema Northern Command-i pa nem temerenshi agütsütsü meranga liasü, ajisüaka sepaitemi, Min Aung Hlaing tetuyuba nung pa anema benokba ken oji agien. Rev. Samson dak alia Bodhbarnü National League for Democracy (NLD) nung züngsem asem- Kachin State social affairs minister U Ne Win, Kachin State immigration & population minister U Zaw Win aser NLD nungi yimsüsür, U Thant Zin Tun nungera jail nungi chiokogo. Ajisüaka sepaitemi, tang chiokertemi tanaben aibelenra tanaben pua ano mapang süklöker tepuokdak ayutsü, ta metetdaksüogo. Myanmar nung sepaitemi democracy sorkar atsüngdokba sülen sepaitemi nisung 26,500 puogo aser tawa nisung aika chiokba sülen maneni nisung 20,300 bo tepuokdak lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngben

(n) tatsüksü atema süng bendena ayuba (pile of firewood)

* Yimtak kibong shia süngben kakabosa nanga ayur.

Süngbennü

(adj) benjong jakdang süng bendenba anogo (day of firewood collection before feast)

* Akhi mapangbo Süngbennü nungiang benjong tenzük.

OLONG PAITEP # 6761

	1			2	3				
4			5						6
					7				
	8								
	9		10			11			
					12			13	
14									
					15				

TIPLEN	LANGTSÜNGLEN
2. Süjeplok - (4)	1. _____ i - (4)
4. O agi merenshi - (5)	3. Kasa masü - (6)
7. Ayongküm li - (5)	5. Nüchi masü - (5)
8. Chiyungtsümapangtsüadok - (4)	6. Tashi endok - (5)
9. Tsüngrem den jembiba - (9)	9. Langtem - (5)
12. Saklok - (4)	10. Anü malidang - (6)
14. Samaba mebushitet - (5)	11. _____ kibur - (5)
15. Mejanga onü - (5)	13. Tebur tembar tsüngda jatepba - (4)
16. Tzü shiruru ka - (4)	

OLONG PAITEP # 6760 TELANGZÜBA

TIPLEN :	LANGTSÜNGLEN :
1. Semtu, 3. Lepko, 5. Bilem,	1. Sayu, 2. Teb, 4. Kimong,
8. Ulu, 10. Tsüngpang,	6. Lungkak, 7. Milak, 9. Zünga,
11. Tesangwa, 13. Aoksa,	10. Temopu, 12. Walu, 14. Ali.
15. Putir, 16. Yipru.	

NAI-A YA METETTER MA



Taoba Mumbai Indians captain Rohit Sharma ya Brehostibarnü MS Dhoni sülen Indian Premier League asaya 250 nung asayaba tanabuba asayar kümogo. Mumbai Indians pur Brehostibarnü Punjab Kings den Mullanpur, Chandigarh nung asayaba mapang pai iba alizüng tongteta liasü. Rohit, mezüng 2008 küm Deccan Chargers nungi asaya tenzük aser pa 2011 küm nungi MI tenüng nung asaya arudar. Pa lenisüba nung MI puri IPL ponguben kokogo. Iba list nung Dhoni ajak dang temaba jenjang nung lir. Pa IPL asaya 256 nung asayar lir.

NH-37 nung totzü abenba gari ka amakba UKNA-i nangzükogo



Imphal, Rongchii/April 18 (Agencies): Silchar aser Imphal na sendaktepba NH-37 nung totzü abenba gari ka amakba United Kuki National Army (UKNA)-i nangzükogo. Iba gari amakba ya Manipur Chief Minister-i anir lokti tentet balalai aitsüogo.

UKNA Defense Secretary-i sangdong ka ajanga, NH-37 nung gari amakba ya par teloki ta shiogo aser Miitei nung nem tenüngdakba oset aser tanga prangbong hadirtem bener otsüba anema tang mezüngbuba jenjang agiogo, ta ashi.

UKNA-isa, gari anisang yirutsüba atema kanga sasa bilemba lemsatepogo aser Imphal-i khu bener aoba gari NH-37 nung ka danga mesenzüsüla, ta tekümdangtsü

metetdaksüogo.

Taoba ita 11 state sorkari jenjang tapet magiba ajanga nüburtem timtem tekangshi nung toksüba aser Kuki nung anema amshitsü asoshi ozüng alema bomb aser tanga prangbong hadirtem belener aoba nokdangtsü atema iba jenjang ya agiogo, ta UKNA-i ashi.

Iba inyakyim ya maneni benoka inyaksangshitsü aser khu belener shirnokisa iba tetuyuba sülen manidaklir parnok ya Kuki nung tsükchir ama züngshitsü aser tashi mangba atema pa/lai khuret abentsü, ta kasa sangdong ajanga metetdaksü.

Kasa mapang nung Imphal nung sentong ka agiba mapang osangbener kati poser ka

sayaba dak sendakba nung Manipur Chief Minister N Biren Sindh-i, NH-37 nung gari amakba telungpurtem aputsü atema bushisüngdang tenzükogo, ta ashi. Paisa, iba inyakyim ya aitsüogo.

Temetetsü kaji totzü abenba gari densema khu abenba garitem security personnel temi meiner Imphal leni oya aliba mapang Kuki telungpurtemi Tousem sub-division, Tamenglong district kübok Tollen Kuki yimtsüng aser Kaimai yimtsüng na tsüngda maka liasü. Iba lendong nung gari anir ka yiru aser khu abenba gari pezü raksa liasü.

Kasa mapang nung Manipur Drivers' Association (MDA), Youth's Forum for Protection of Human Rights (YFPHR), Joint Tribes Students' Association (JTSA) of All Inpui Students' Union (AISU), Zeme Students' Organisation, Manipur (ZSOM), Rongmei Naga Students' Organisation, Manipur (RNSOM), aser Liangmai Naga Kati-mai Ruangdi, Manipur (LNKR-M) nungeri khu abenba garitem amakba aitsüogo.

Kuki Inpi-i Manipur nung Kuki nung voter tem nem tetuyuba agütsü

Imphal, Rongchii/April 18 (Agencies): Congress party indang manifesto point 5buba nung Manipur nung aliba nüburtem ajaki agizüktettsüsa yimden yimsüsüba aser inyakyim nung telemtetba ka bener arutsütsü nangzükba dak ajemdaker Kuki Inpi Manipur, KSO-GHQ, Kuki Inpi Churachandpur aser KNO Churachandpur den KNO densema Kuki SoO telok tem-i Congress party (INC) den tenangzüktepba ka yangluogo.

Iba osang ya Kuki Inpi, Manipur Department of Political Affairs-i Bodhbarnü metetdaksü.

Manipur nung Lok Sabha election nung Congress candidate ana Inner Manipur Parliamentary aser Outer Manipur PC nungi tokteptsü renema lir.

Tenangzüktepba nung Kuki nung lokti tentet balala aser lenirtemi MP election nung Kuki nung indang vote ajak mesüra Kuki nungeri amokbanger aliba

tesemtem nung menden anaprongla ateam vote ajak INC candidate tem nem agütsütsü ta nangzükteper lir.

Iba melena Congress party-i Kuki nungertemi state balaka asoshi ahangba agütsütsü. Iba state ya Manipur kübok Churachandpur, Pherzawl, Kangpokpi. Tengenoupal, Chandel, aser Jiribam districts aser Ukhrul, Senapati, Tamenglong, Imphal East & West, Thoubal, aser Bishnupur amala district tem kong Kuki nung lidar idak nungjiangi agitetsü.

Congress party-i, Kuki (Any Kuki Tribes of 2003) nung kümzüka ayutsü aser parnok (Kuki/AKT) Manipur nung Scheduled Tribes list nungi agintsü merangba anema raratsü, saka 1956 küm agizükba Chin-Zomi-Mizo kin ajak agintsü.

Manipur nung NRC benokba mapang Kuki nungertem National Register of Citizens (NRC) tazüokba

küboki maitdaksütsü.

Anungji iba tenangzükba dak ajemdaker Kuki nung ajak dang Outer Manipur aser in Inner Manipur nung taruba election nung INC candidate tem nem vote agütsütsü tetuyuba agütsüogo.

Iba tetuyuba sülen manidakertem nem tapet temerenshi agütsütsü ta kasa sangdong ajanga metetdaksüogo.

Tawa Tuibong nung Kuki Inpi office nung KNO nungi Kuki nung lenirtem, Kuki Inpi, KSO, aser Saikot MLA Paolienlal Haokip, Singhat MLA Chinlunthang Zou & Henglep MLA Letzamang Haokip nung densema Kuki nung MLA tem senden ka amenba sülen iba tetuyuba agütsüogo.

Congress candidate Alfred Arthur, Congress lenir temerenshi agütsütsü ta kasa sangdong ajanga metetdaksüogo.

Social activist Nilberth-i CEC nem tashishiba ka agütsü

Tura, Rongchii/April 18 (Agencies): East Garo Hills, Meghalaya kübok Williamnagar nungi social activist Nilberth Ch Marak-i, ozüng alema khu abenba gari nung moji (sugar) bener Bangladesh-i aoba dak sendakba nung Chief Election Commission (CEC) nem tashishiba ka agütsüogo.

Marak-i ashiba agi, iba inyakyim ya Supreme Court tetuyuba aser Model Code of Conduct (MCC) anema lir.

South Garo Hills kübok Joshipara nung Mongolbarnü khu tali bener süiba ajanga apu tongtibang ka chirepba sülen iba tashishiba ya agütsü.

Nilberth-i, North, West, aser South Garo Hills districts Deputy Commissioners aser Superintendents of Police aser Gasupara, South Garo Hills nung custom ketdangsurtem anema tashishiba agütsü liasü.

Taoba mapanga Nilberth-i, North Garo Hills SP, Bruno A Sangma anema tashishiba ka benok aser iba ajanga pa tanga tesem kati yok aser pa melena Abraham T Sangma shima liasü.

"Nü indang office-i ni mepeshiba anga-a pa melena SP Abraham T Sangma yok. Ajisüaka garitem nung khu tali abenba masadanger aser

sadem sadema dang senzüdaksür, aser iba ajanga Joshipara nung apu tongtibang ka chirepogo," ta Nilberth-i tashishiba nung shia lir.

Apu chirepba ajanga iba tesem temeket nung alirtem atema dang masü saka Baghmara nung amenoka aliba sorkar tenzükertem aser South Garo Hills kübok polling stations balala atema shimmer aliba polling ketdangsurtem tetsükdaksü adoker ta shia Nilberth-i shisema aliba ketdangsurtem anema takaratiba nung jenjang tapet agitsü mepeshia metetdaksüogo.

